

NOU, Moun GWADLOUP ka déklaré :

Awtik 1 :

Wi nou sé on sèl Nasyon anlè chimen a nèg mawon ki pété chenn kon Inyas.

Awtik 2 :

Nou ka palé é maké lang an - nou Kréyòl, tout koté an GWADLOUP é asi latè.

Awtik 3 :

Nou ka travay tè, manjé silon laliwondaj an - nou, lévé é kyouyé bèt an - nou silon mès é labitid an - nou.

Awtik 4 :

Tousa sé Ka, matris a tout zanfan Gwadeloup.

Awtik 5 :

Nou ka débatizé lari otila ni non a kolon malfètè, asasen é volè. Pou nou ba - yo non noumenm an - nou. Non a Nèg, non a Zendyen, non a Blan Gwadeloup, é non a tout dèt nonm ki woulé pou wouvè lèspwi a nonm asi Latè.

Awtik 6 :

Nou ka mandé, ki sé radyo, ki sé télé é ki tout larèstan moun ka bay lavwa asi sa ki Gwadeloup poubon, yo voyé douvan nanm a pèp - la. Kivédi, yo pa andwa mouchté dékatman an nou é opozé nou di, sa nou yé.

Awtik 7 :

An liyannaj avè travayé é pèp okonba adan LKP, nou ka é ké, fè tou sa ki fo, lè é la i ké fo pou opozé tout kalité lotorité, tout kalité dèt nasyon mété lanmen asi pawòl maké - lasa. Davwa, sé pawòl maké - lasa, sé yo ka wouvè lawonn a nanm Gwadeloup.

**Lapwent, 21 ÒKTÒB 2010.
LKP**

*Dapwé dwa tout nonm ki nonm tini dépi i fèt nonm,
Dapwé Déklarasyon a Nasyon Mandé dépi 1212 pou
tolérans é libète kalanswa ras a-w,
Dapwé chimen a lonn é respé Inyas montré an
Òktòb 1801,
Dapwé Déklarasyon Delgrès té maké « dennyé
èspwa »,
Dapwé chimen a nèg mawon ki kontinyé goumé
ève solidarité a karayib-nèg,
Dapwé tout travay a lé vayan mètan tanbouyé,
chanté, maké, poèt natif natal,
Dapwé konba agrikilté, péyizan é ouvriyé nèg,
zendyen é blan menné dépi anba jouk a kolon-la jis
an 1910, 1925, 1952, 1967 é adan platfòm a LKP an
2009,
Dapwé déklarasyon kiltirèl a Mouvman Kiltirèl Akiyo
é Mouvman Kiltirèl Voukoum a 2001,*

Souvernité Kiltirèl Gwadeloup